



送你最後一程

爸，人生好比是一條路，今仔日，你的某团序細、厝邊頭尾、叔伯姑娘、親情朋友，攏來遮送你最後一程。目籬紅紅、心情沉重，悲傷的目屎滴袂離；艱苦的話語講袂止，大家攏足毋甘的，你知無？

有的，毋甘你一世，為著生活日操暝拚，才拄仔退休，就離開这个世界！

有的，毋甘你幾十年來，為咱的地方巡頭顧尾；替咱的鄉親熱心走從(tsông)。

有的，總是想起你平時暢樂趣味好鬥陣，淋酒袂醉，喝拳袂輸的豪氣。

有的，無法度放袂記，你做工課的時，上山落海，peh懸躑(nng)下，拚甲大粒汗細粒汗，做代先無推辭。

嘛有人共我講：恁老爸夯鋤頭，掘(kút)了比人較深；提(thèh)毛筆，撇了比人較嬌(suí)。

猶閣有人講，你有能力欠栽培，親像大船駛入溪……。

唉！爸，自古以來，世間無完人，是按怎，你的慈悲、你的頂真、你的親切、你的拍拚、你的才情，你所有的好，會予眾人遮爾懷念，遮爾呵啉(o-ló)呢？我前思後想，尾仔才了解，是毋甘啊！毋甘彼个活跳跳，用心佮人交陪；用情和(hâm)人盤擱(puân-nuá)；用負責任做稽頭的你，哪會雄雄就按呢揮別人間，魂歸西天呢？

你往生的彼一暝，雨水pìn-piàng叫，予我想起二十七冬前，我拄仔考著師專欲去台北報到的彼一工，是一个風sng-sng吼；雨滴落來，袂輸是針咧鑿(tshák)的風颳天。火車停駛，你驚我袂赴，騎一台野狼仔一二五的機車，載著我，兼一kha皮箱、一領棉被。北宜公路，九彎十八幹(uat)，咱的心情嘛敢若(ká-ná)彼條路，彎彎曲曲、起起落落。雖然真擔心，只是你的車手掠真在，一面掖(iā)銀紙，請沿路的好兄弟共咱鬥保庇；一面油門共伊催落去，勇敢向前行。風閣較透，嘛有消風的時；路閣較遠，毋信走袂到位，最後咱真順序來完成報到。

你毋驚風，毋驚雨，面對困難的勇氣，我永遠都(to)會記得。你是我心目中慈愛的老爸，嘛是使人尊敬的「勇伯」仔！

紅塵厚煩惱，人間多是非。這幾若冬，你定定面仔憂憂，目頭結結，心肝頭不時結規糾。你睏袂去，放袂開，胸坎好親像有一粒大石頭砬牢咧(teh-tiâu-leh)。你足想欲大聲喝，毋過聲音卡(kháh)佇嚨喉蒂仔；你足想欲恢復過去的暢樂趣味，毋過憂鬱症佮你形影

不離；雖然你的名內底有一个「勇」字，面對人生種種的打擊佢無奈，你已經失去繼續承擔的勇氣。

你的痛苦阮明白，大家攏苦勸你心情放輕鬆、跔步愛飄撇。問題是千斤重擔有人扛，四兩病痛無人分，你的鬱卒，阮只有了解，無法度排解啊！阮足希望你會當：輕的放風吹，重的放水流，心無掛礙。但是，少少幾若(kuí-nā)字，喺講誠簡單，欲做真困難，你的鬱悶，阮欲哪會毋知呢？

田螺含(kâm)水過冬等春天，無定著你的春天嘛欲來矣！是無？我親愛的爸爸。只是你講「路頭拈(ni)燈芯，路尾夯秤錘」，你忝矣！無愛等矣！無愛等彼个天清日頭光、花芳風微微的春天……。阮按怎都(to)想袂到，一向軟心做人的你，竟然用上殘忍的方式來對待家己……。天公伯仔！你有聽著阮內心的苦痛(thàng)佢咻喝(hiu-huah)無？

「蜈蚣百足行不如蛇；閩雞翅大飛不如鳥；馬有千里之能，無人不能自往；人有沖天之志，無運不能自通，時也、運也、命也，非我之不能也」，也是非你之不能也！爸，這就是人生啊！閩較拚勢，嘛離袂開「時也、運也、命也」！所以：毋管啥物代誌，只要盡力就好；無論成功、失敗，但求問心無愧。爸，所有的人攏足清楚的，你已經盡力矣，你會使問心無愧looh！

各人(kok-lâng)造業各人擔，別人的錯誤佢疏忽，無應當造成你心內的負擔，你更加毋免用你寶貴的性命來點醒別人的糊塗佢荏(lám)懶！

「神仙拍鼓有時錯，跔步踏差啥人無」，知過能改上重要。peh倒去，爬起來，跔手拌拌咧，閩重新出發……。這是你對阮的教示，阮會謹記在心，互相提醒。媽媽的生活，我佢小弟、阿嫂會用心照顧；囝孫序細攏會認真學習、自立自強。俗語講：靠山，山會倒；倚水，水會焦。在生，你為阮付出，替阮發落；從今以後，阮著愛一步一跔印，實實在在，予你在天之靈會當歡歡喜喜，無憂無愁。

「生(sing)何歡 柴米油鹽使人(lâng)煩
死(sú)何悲 佛祖神仙接我(ngóo)歸」

爸，你有看著無？這是我為你寫的輓(buán)聯。是毋是吵吵鬧鬧的人生、亂亂紛紛的世事，已經無啥物值得你留戀？所以這擺，你才會感心(tsheh-sim)做你去。如今，阮干焦(kan-nā)會當掠你的相片金金看，將你的名字聲聲喝，問蒼天，茫茫渺渺的黃泉路，你到底是在佢位(tó-uī)咧？

人過身了後，是結束？抑是另一種的開始？我毋知影，我只是由衷的向望，向望伊是苦難的結束，重生的開始。三工前，我去台北恩主公廟，虔心跋杯請示關聖帝君，帝君講你這馬過了真好，叫阮免煩惱。猶有一个通靈的朋友，看著你佢一个所在抄佛經，因為佛祖講你無乖，共阮放咧，做你先走，予阮遐數念；而且你的字寫甲遮爾嬌(suí)，抄經冊對你來講，是一个小小的處罰、大大的修行。阮佇遮，欲來拜託佛祖菩薩，一定愛共你好好仔疼惜，沓沓仔(tauh-tauh-á)牽成，幫助你修著正果，得樂離苦。

爸，人生本來就是一條路，阮越頭看你所行過的這條路，風風雨雨、坎坎坷坷，別人為你心疼抱不平，只是你從來毋捌怨嘆妒恨。路頭歹，你的跂力行踏，總是一gám一gám寬寬仔peh；一伐(huáh)一伐照步來，你勤快認分的體樣背影，會永遠留佇阮的心目中。

告別式的會場，香煙濛霧，白花清芳，氣氛肅靜而哀愁……。我親愛的爸爸，阮這馬欲送你最後一程looh！你佇天頂，一定愛紮著某团序細、厝邊頭尾、叔伯姑娘、親情朋友的祝福，安心、放心、快樂，向前行(hîng)。

創 作 理 念

我的父親，長期為憂鬱症所苦，今年，他用自殺結束了六十六年的生命。儘管他的名字中有一個「勇」字，但面對困境，他已無力去「勇於承擔」。親友的難過與不捨，在張羅喪禮的過程中，一次次的被觸動。於是我把眾人對他的懷念，寫成了這篇悼念文，並於告別式中誦讀。

當人嚥下最後一口氣，是結束？還是另一個開始？我不知道，卻由衷希望，它是苦難的結束，重生的開始。如今，他已踏上幽冥之界，我，以筆抒情，化悲慟為聲聲祝福——送他最後一程。

黃志遠

臺北市大安區維康中醫診所中醫師

劉芝彤

臺北市中山區永安國小教師

